

A Slolonel Dios D'a Viñaj

ABDÍAS

Abdías sb'i jun libro tic, yujto a slolonel Dios yalnac d'a viñaj Abdías tz'ib'ab'ilcan d'ay. A jun yune' ab'ix aycan d'a jun libro tic, aton tas slaj sc'ulej eb' aj Edom d'a eb' aj Judá ayic van yac'ji ganar Jerusalén yuj eb' ajc'ool. A viñaj Abdías viñ schecab' Dios chi', a viñ alannac to ol javoc yaelal d'a yib'añ eb' aj Edom yuj tas sc'ulej eb' chi', icha syal d'a versículo 1 masanto d'a 14. Syalanpaxcan viñ to jab'xoñej tiempo sjavi yoval sc'ol Dios. Ayic ol javoc jun c'ual chi', ol javal d'a yib'añ eb' aj Edom chi'. Axo eb' aj Judá, ol chajoc sb'oxiq'ue schoñab' eb' d'a sluum, ol c'ochxoc eb' ichataxon yaji, xchi d'a versículo 15 masanto d'a 21.

A yaelal ol cot d'a yib'añ choñab' Edom

1 A in Abdías in tic, icha vayich ix yutej Jehová yalan juntzañ tic d'ayin yuj eb' aj Edom:

Ix vab' yalan Jehová Cajal icha tic: Ix schecb'at jun schecab' d'a juntzañxo nación, ix b'at yalan jun lolonel tic: Aq'uec lista e b'a. B'at caq'uec oval d'a Edom, xchi.

Icha tic yalan Jehová Cajal d'a eb' aj Edom:

2 Ex aj Edom, mañxa jab'oc ol aj eyelc'och vuuj d'a scal juntzañxo nación, ol ex in patiquej-caneli.

3 A eyac'umtaquil tzex ac'an musansatil. Cajan ex d'a yoltac q'uen nivac tenam yed' d'a jolomtac vitz te chaañ, yuj chi' tze na'a to malaj mach syal ex sataneli.

4 A in Jehová in svala', vach'-chom tzex te b'at icha noc' d'iv sb'o so' b'aj te chaañ, ichato d'a scal q'uen c'anal, ato ta' ol ex viq'uemta.

5 Q'uinaloc d'ac'valil sjavi junoc elc'um, max yic'b'atlaj masanil tastac. Q'uinaloc a junoc smolan sat avb'en, ayto b'aj scan jun-junocxo yuuj. Palta a eb' ajc'ool, junelñej ol ex satel yuj eb'.

6 A ex yiñtilalcan viñaj Esaú, ilb'ajc'ol ol ex ajcanoc. Masanil e b'eyumal molan eyuuj, ol elc'ajb'atoc.

7 Masanil eb' ayoch eyed'oc, ol ex yac' musansatil eb'. Ol ex spechel eb' d'a sat e luum. A eb' vach' eyac'an yed'oc, ol mel-tzajoch eb' ajc'olal d'ayex, a eb' junñej sva eyed'oc, ol sb'oem yaal eb' d'a yol e b'e, palta mañ ol e nael-laj.

8 Ex aj Edom, ayic ol vac'anoch eyaelal, ol in satel masanil eb' ay spensar d'a e cal, mañxa junoc eb' jelan ol can d'a yol e macb'en chi'.

9 Ex aj Temán, a eb' jelan yac'an oval d'a e cal, ol te ib'xocq'ue eb' yuj xivelal. Mañxa junoc ex cajan ex d'a tzalquixtac d'a Edom ol ex canoc.

A schucal eb' aj Edom

- 10 Q'uixvelalxoñej ol ex ajcanoc.
Ol ex satcanel d'a junelñej,
yujto ix eyixtej eb' yiñtilal viñaj
Jacob, aton viñ yuc'tac viñ e
mam eyicham Esaú.
- 11 A ex tic, toñej ix ex och q'uelan
ayic ix mac'chajpoj spuetail
Jerusalén yuj eb' ajc'ool, ayic ix
ic'chajb'at masanil eb' soldado
Jerusalén chi' yuj eb' ch'oc
choñab'il. Ayic ix spucanec'
sb'eyumal Jerusalén eb' ajc'ool
chi', lajan ix eyutej e b'a yed' eb'.
- 12 Comonoc maj ex tzevajoc ayic
ix eyilan tas ix aj eb' e c'ab'
eyoc chi', d'a jun c'u ayic ix javi
yaelal d'a yib'añ eb' aj Judá.
Comonoc maj ex tzalajoc ayic ix
lajviem eb' d'a jun c'u chi'.
Comonoc maj ex b'uchvaj d'a
eb', ayic ayoch eb' d'a syaelal.
- 13 Comonoc maj ex och d'a yol in
choñab' ayic ayoch eb' d'a sya-
elal. Comonoc maj ex tzevaj yuj
tas ix ic'an eb'. Comonoc maj
eyelq'uej tastac ay d'a eb'.
- 14 Comonoc maj ex och e mac sat
eb' van sb'at elalal d'a b'ajtac
ay utzin b'e yic tze mac'ancham
eb'. Comonoc maj eyac'och eb'
d'a yol sc'ab' eb' ajc'ool ayic
ayoch eb' d'a syaelal.
- 15 Lac'anxo sjavi jun c'ual ayic ol
vac'ancot yoval in c'ol d'a
yib'añ masanil nación. Icha tas
ix e c'ulej, ichaval chi' ol ex
yutej juntzañixo anima. Ol e
chaan spac icha val smojal.
- 16 Icha ix aj e tzalaj eyuc'an añ d'a
tzalan b'aj tz'och ejmelal d'ayin,

ichaval chi' ol aj eyab'an syail
yoval in c'ool yed' juntzañixo
nación. Ichato ol eyuc' añ añ te
ov masanto ol ex telvoc, ol ex
satel d'a junelñej.

Ol ic'jichaañ Israel

- 17 Palta a tzalan Sion, vicxo ol
ajcanoc. Ata' ol cajnaxoc eb'
yiñtilal Jacob olto colchajcanoc
yed' lum sluum juntzañixo ch'oc
nacional, ol yiquej pax can lum
eb'.
- 18 A eb' yiñtilal Jacob chi', aton
eb' yiñtilal José, a eb' chi', lajan
ol aj eb' icha yoc te' c'ac' sq'ue
ñiññonoc. Axo eb' yiñtilal Esaú,
lajan ol aj eb' icha añ ac
stz'ab'at yuj c'ac' d'a junelñej. A
in Jehová in svala' to mañxa
junoc eb' yiñtilal Esaú ol col-
chajcaneloc.
- 19 A eb' israel cajan d'a lum
Neguev, ol yic' lum tzalquixtac eb' d'a
yol yic Edom. Añeja' eb' cajan d'a pañ-
quiltac, ol yic'pax lum sluum eb' filis-
teo eb'. A eb' yiñtilal Israel, ol yic'xi
lum smacb'en Efraín eb' yed' lum
smacb'en Samaria. Axo eb' yic Ben-
jamín ol ic'ancan lum smacb'en
Galaad. 20 Axo nañalxo eb' israel, eb'
ic'b'ilb'at d'a ch'oc choñab'il, a eb' ol
scha smacb'en d'a lum smacb'en eb' aj
Canaán, masanto d'a choñab' Sarepta.
Axo eb' aj Jerusalén ic'b'ilb'at d'a
ch'oc choñab'il cajan d'a Sefarad, a eb'
ol ic'an juntzañ choñab' d'a yol yic
Neguev. 21 Ol q'uec'och eb' colchaj-
nac chi' d'a tzalan Sion, ol yac' yajalil
eb' d'a slum eb' yiñtilal Esaú. A d'a jun
tiempoal chi', axoñej Jehová ol ac'an
Yajalil.